

46-bob. Bojxona to'lovlarini to'lash tartibi va muddatlari

327-modda. Bojxona to'lovlarini to'lash muddatlari

Bojxona to'lovlari bojxona deklaratsiyasi qabul qilinguniga qadar yoki qabul qilinishi bilan bir vaqtda to'lanadi, bundan ushbu moddaning ikkinchi va uchinchi qismlarida nazarda tutilgan hollar mustasno.

Tovarlarning ayrim toifalariga nisbatan bojxona to'lovlarini to'lash muddati quyidagicha belgilanadi:

quvur transportida yoki elektr uzatish liniyalari orqali olib o'tiladigan tovarlar uchun — ushbu Kodeksning 172-moddasiga muvofiq;

shartli chiqarib yuborilgan tovarlardan bojxona to'lovlarini to'lash bo'yicha imtiyozlar berilishidan ko'zlanganidan boshqa maqsadlarda foydalanilgan taqdirda — tovarlardan foydalanish va ularni tasarruf etish bo'yicha cheklovlarga rioya etilmagan birinchi kun;

bojxona chegarasi orqali noqonuniy olib o'tilayotgan tovarlar uchun — bojxona chegarasi kesib o'tilgan kun. Agar bu kunni aniqlashning imkoni bo'lmasa, tovarlarni bojxona chegarasidan noqonuniy olib o'tish fakti bojxona organlari tomonidan aniqlangan kun bojxona to'lovlarini to'lash kuni hisoblanadi;

bojxona hududiga vaqtincha olib kirilgan tovarlar uchun — ushbu Kodeksning 66-moddasiga muvofiq.

Bojxona to'lovlarini kechiktirib yoki bo'lib-bo'lib to'lash imkoniyati berilgan taqdirda, bojxona to'lovlarini kechiktirib va bo'lib-bo'lib to'lashga imkoniyat berilgan oxirgi to'lash kuni bojxona to'lovlarini to'lash muddati hisoblanadi.

To'lanishi bojxona rasmiylashtiruvi bilan bog'liq bo'lmagan bojxona yig'implari bojxona organlari tomonidan

tegishli harakatlar va tartib-taomillar bajarilishidan oldin to‘lanadi.

Bojxona to‘lovlarini to‘lash muddatlari buzilgan taqdirda bojxona to‘lovlari o‘z vaqtida to‘lanmaganligi uchun ushbu Kodeksning [349-moddasiga](#) muvofiq penya hisoblanadi.

328-modda. Bojxona to‘lovlarini to‘lash tartibi

Bojxona to‘lovlari to‘lovchi tomonidan bojxona organlarining qonun hujjatlariga muvofiq shu maqsadlarda ochilgan shaxsiy g‘azna hisobvaraqlariga to‘lanadi.

To‘langan bojxona to‘lovlari tovar chiqarib yuborilgan kundan yoki to‘lanishi tovarlarning bojxona rasmiylashtiruviga bog‘liq bo‘lmagan bojxona to‘lovlari uchun bojxona organi tomonidan harakatlar yoki tartib-taomillar bajarilgan kundan e‘tiboran besh ish kuni ichida bojxona organlari tomonidan O‘zbekiston Respublikasining Davlat budjetiga o‘tkaziladi.

Bojxona to‘lovlari, agar qonun hujjatlarida boshqacha qoida nazarda tutilmagan bo‘lsa, O‘zbekiston Respublikasining milliy valyutasida to‘lanadi.

329-modda. Bojxona to‘lovlarini kechiktirib va bo‘lib-bo‘lib to‘lash imkoniyatini berish shartlari

Bojxona organining qaroriga asosan to‘lovchiga bojxona to‘lovlarini kechiktirib yoki bo‘lib-bo‘lib to‘lash imkoniyati berilishi mumkin.

Bojxona to‘lovlarini to‘lash muddatining qo‘shimcha davrga uzaytirilishi bojxona to‘lovlarini kechiktirib to‘lashdir.

Bojxona to‘lovlarini to‘lash muddatini qo‘shimcha davrga uzaytirib, to‘lanishi lozim bo‘lgan bojxona to‘lovlari summasini

shu davr ichida qismlarga bo‘lib to‘lash bojxona to‘lovlarini bo‘lib-bo‘lib to‘lashdir.

Bojxona to‘lovlarini kechiktirib yoki bo‘lib-bo‘lib to‘lash bojxona deklaratsiyasi qabul qilingan kundan e‘tiboran oltmish kalendar kundan oshmasligi lozim, bundan ushbu moddaning [beshinchi](#) va [o‘ninchi qismlarida](#) nazarda tutilgan hollar mustasno.

Bojxona deklaratsiyasi qabul qilingan kundan e‘tiboran to‘qson kalendar kun muddatga kechiktirib to‘lash imkoniyati quyidagilar bo‘yicha beriladi:

ishlab chiqaruvchi korxonalarga eksport mahsulotini ishlab chiqarish uchun foydalaniladigan, bojxona hududiga olib kiriladigan tovarlar uchun qo‘shilgan qiymat solig‘ini to‘lash bo‘yicha;

moddiy ishlab chiqarish va xizmatlar ko‘rsatish sohasidagi mikrofirmalar hamda kichik korxonalarga, fermer xo‘jaliklariga, shuningdek yuridik shaxs maqomini olgan dehqon xo‘jaliklariga o‘z ehtiyojlari uchun olib kirilayotgan tovarlar uchun bojxona to‘lovlarini to‘lash bo‘yicha.

Bojxona to‘lovlarini kechiktirib yoki bo‘lib-bo‘lib to‘lash imkoniyati bojxona to‘lovlarining bitta yoki bir nechta turiga, shuningdek to‘lanishi lozim bo‘lgan butun summaga yoki uning bir qismiga nisbatan berilishi mumkin.

Bojxona to‘lovlarini kechiktirib yoki bo‘lib-bo‘lib to‘lash imkoniyatini berish to‘g‘risidagi qaror ushbu Kodeksning [330-moddasida](#) nazarda tutilgan zarur hujjatlar taqdim etilgan kundan e‘tiboran besh ish kunidan ortiq bo‘lmagan muddatda bojxona organi tomonidan qabul qilinadi.

Bojxona organining qarorida bojxona to‘lovlarini kechiktirib yoki bo‘lib-bo‘lib to‘lash imkoniyati berilayotgan

muddat, bunday imkoniyat berish rad etilgan taqdirda esa rad etish sabablari ko'rsatiladi.

Bojxona to'lovlarini kechiktirib yoki bo'lib-bo'lib to'lash imkoniyati ushbu Kodeksning [47-bobida](#) nazarda tutilgan tartibda bojxona to'lovlari to'lanishini ta'minlash sharti bilan beriladi.

Bojxona to'lovlarini kechiktirib yoki bo'lib-bo'lib to'lash imkoniyati O'zbekiston Respublikasi Prezidentining yoxud O'zbekiston Respublikasi Vazirlar Mahkamasining qaroriga binoan uzoqroq muddatlarga va bojxona to'lovlari to'lanishi ta'minlanmagan holda berilishi mumkin.

330-modda. Bojxona to'lovlarini kechiktirib yoki bo'lib-bo'lib to'lash imkoniyatini olish uchun taqdim etiladigan hujjatlar

Bojxona to'lovlarini kechiktirib yoki bo'lib-bo'lib to'lash imkoniyatini olish uchun to'lovchi bojxona organiga:

bojxona to'lovlari summalarini to'lash bo'yicha yozma majburiyatni o'z ichiga olgan arizani;

ushbu Kodeksning [47-bobiga](#) muvofiq bojxona to'lovlari to'lanishi ta'minlanganligini tasdiqlovchi hujjatni taqdim etadi.

331-modda. Bojxona to'lovlarini kechiktirib yoki bo'lib-bo'lib to'lash imkoniyatini berishni rad etish asosi

Bojxona to'lovlarini kechiktirib yoki bo'lib-bo'lib to'lash imkoniyatini berishni rad etish uchun quyidagilar asos bo'ladi:

ushbu Kodeksning [330-moddasi](#) talablariga rioya etilmaganligi;

bojxona to'lovlarini ilgari berilgan kechiktirib yoki bo'lib-bo'lib to'lash imkoniyati bo'yicha to'lash muddatlari buzilganligi faktlarining mavjudligi.

332-modda. Bojxona to'lovlarini kechiktirib yoki bo'lib-bo'lib to'lash imkoniyati berilganligi uchun foizlar

Bojxona to'lovlarini kechiktirib yoki bo'lib-bo'lib to'lash imkoniyati berilgan har bir kun uchun to'lanishi lozim bo'lgan bojxona to'lovlari summasidan O'zbekiston Respublikasi Markaziy banki tomonidan belgilangan qayta moliyalashtirish stavkasining ellik foizi miqdorida, bir kun uchun qayta hisob-kitob qilingan hisoblab chiqariladigan foizlar undiriladi.

Foizlar kechiktirib yoki bo'lib-bo'lib to'lash imkoniyati berilgan bojxona to'lovlarining summasi to'languniga qadar yoki to'lash bilan bir vaqtda, lekin kechiktirib yoki bo'lib-bo'lib to'lash muddati tugaydigan kundan keyingi kundan kechiktirmay to'lanadi.

Ushbu Kodeks 329-moddasining [beshinchi](#) va [o'ninchi qismlarida](#) nazarda tutilgan hollarda bojxona to'lovlarini kechiktirib yoki bo'lib-bo'lib to'lash imkoniyati berilgan taqdirda, foizlar hisoblanmaydi va to'lanmaydi.

Bojxona to'lovlari bo'yicha kechiktirib yoki bo'lib-bo'lib to'lash imkoniyati berilganligi uchun foizlarni to'lash, undirish va qaytarish ushbu bobda, shuningdek ushbu Kodeksning [48](#) va [49-boblarida](#) nazarda tutilgan tartibda amalga oshiriladi.

333-modda. Bojxona to'lovlarini kechiktirib yoki bo'lib-bo'lib to'lash imkoniyati berilganda ularning summalarini to'lash muddatlari

Bojxona to'lovlarini kechiktirib yoki bo'lib-bo'lib to'lash imkoniyati berilganda to'lovchi tomonidan ularning summalarini to'lash:

kechiktirib to'lash imkoniyati berilganda — kechiktirib to'lash muddati tugaydigan kundan kechiktirmay;

bo‘lib-bo‘lib to‘lash imkoniyati berilganda — bojxona organi tomonidan to‘lovchi bilan birgalikda tasdiqlangan jadval bo‘yicha bo‘lib-bo‘lib to‘lanadigan summalarni kiritishning kelishib olingan kunlaridan kechiktirmay amalga oshiriladi.

Kechiktirib yoki bo‘lib-bo‘lib to‘lash imkoniyati berilgan bojxona to‘lovlarining summalari to‘lovchi tomonidan o‘z vaqtida to‘lanmagan taqdirda, bojxona organlari bojxona to‘lovlarini to‘lash bo‘yicha qarzdorlikning butun summasini ushbu Kodeksning [47](#) va [48-boblarida](#) nazarda tutilgan tartibda depozit, tovarlar garovi, bank kafolati, sug‘urta polisi yoki kafillik bilan ta‘minlangan pul mablag‘lari hisobidan undirib olish choralari ko‘radi.

334-modda. Kelgusi bojxona to‘lovlarini to‘lash uchun pul mablag‘lari

To‘lovchi bojxona deklaratsiyasi qabul qilinguniga qadar kelgusi bojxona to‘lovlarini to‘lash uchun pul mablag‘larini dastlabki tarzda (bundan buyon matnda dastlabki pul mablag‘lari deb yuritiladi) bojxona organining shaxsiy g‘azna hisobvarag‘iga o‘tkazishi mumkin.

To‘lovchining ko‘rsatmasiga ko‘ra dastlabki pul mablag‘laridan:

bojxona to‘lovlarini to‘lash uchun;

penya, foizlar to‘lash majburiyatlarini bajarish hisobiga deb;

bojxona to‘lovlarini to‘lash bo‘yicha qarzdorlikni to‘lash uchun;

bojxona to‘lovlari to‘lanishini ta‘minlash uchun foydalanilishi mumkin.

To'lovchi bojxona organiga mazkur dastlabki pul mablag'lariga bojxona to'lovlari sifatida qarash haqida ko'rsatma bermaguniga qadar ushbu mablag'larga bojxona to'lovlari sifatida qaralishi mumkin emas. To'lovchining bojxona deklaratsiyasini topshirishi yoki dastlabki pul mablag'laridan penya, foizlar to'lash majburiyatlarini bajarish hisobiga deb, bojxona to'lovlari to'lanishini ta'minlash yoxud bojxona to'lovlarini to'lash bo'yicha qarzдорlikni to'lash uchun foydalanish haqidagi arizasini berish to'lovchining ko'rsatmasi hisoblanadi.

335-modda. Dastlabki pul mablag'larini qaytarib berish tartibi

To'lovchi dastlabki pul mablag'lari ushbu mablag'lardan oxirgi foydalanilgan kunning ertasidan e'tiboran uch yil ichida qaytarib berilishini talab qilishga haqli.

Dastlabki pul mablag'larini qaytarib olish uchun to'lovchi shaxsiy g'azna hisobvarag'iga ko'rsatilgan pul mablag'lari o'tkazib berilgan bojxona organiga dastlabki pul mablag'larini qaytarib berish to'g'risida ariza taqdim etadi. To'lovchi bojxona organiga ariza bilan bir vaqtda to'lovchi va bojxona organi o'rtasidagi o'zaro hisob-kitoblarni solishtirish dalolatnomasini taqdim etadi.

Bojxona organi o'n besh ish kunidan ko'p bo'lmagan muddatda o'zaro hisob-kitoblarni solishtirish dalolatnomasida ko'rsatilgan ma'lumotlarni solishtirib chiqadi.

O'zaro hisob-kitoblarni solishtirish dalolatnomasi bojxona organining mansabdor shaxsi va to'lovchi tomonidan imzolangan kunning ertasidan e'tiboran uch ish kuni ichida bojxona organi dastlabki pul mablag'lari qaytarilishini amalga oshiradi.

To'lovchida bojxona to'lovlarini, shuningdek penya yoki foizlarni to'lash bo'yicha qarzdorlik bo'lgan taqdirda, dastlabki pul mablag'lari to'lovchining roziligi bilan ushbu qarzdorlik chegirib qolingan holda qaytarib beriladi.

Agar dastlabki pul mablag'larini qaytarib berish haqidagi ariza ushbu moddaning [birinchi qismida](#) ko'rsatilgan muddat ichida taqdim etilmagan bo'lsa, ushbu pul mablag'lari bojxona organi tomonidan O'zbekiston Respublikasining Davlat budjetiga o'tkaziladi.